

U Ljetnom kinu Raiffeisen podignuto najveće kino platno u regiji



Finaliziraju se i posljednje pripreme festivalskih lokacija. Danas je u Ljetnom kinu Raiffeisen podignuto najveće kino platno u regiji.



Kako je saopćila Press služba Festivala, gledanje filmova iz programa Open Air pod vedrim nebom, gdje se svake festivalske večeri okupi više od 3000 filmskih zaljubljenika, poseban je doživljaj. Program Open Air na najatraktivnijoj festivalskoj lokaciji ove godine, uz film otvaranja, donosi sedam nagrađivanih ostvarenja.

Prvu noć će biti prikazan film "Sin" bh. redateljice Ines Tanović (16. augusta), koji će u Takmičarskom program – igrani film zabilježiti svjetsku premijeru.

Direktor Sarajevo Film Festivala Mirsad Purivatra obišao je danas festivalske lokacije i s načelnikom Općine Centar Nedžadom Ajnadžićem.

Načelnik Ajnadžić je ovim povodom istakao da je Sarajevo Film Festival susret civilizacija i kultura, brend Bosne i Hercegovine i regije.

-U Sarajevo Film Festival treba ulagati kako država, tako Federacija, kanton i svi nivoi. Mi stojimo na raspolaganju i već iduće godine ćemo napraviti konkretne korake da poboljšamo ono na čemu možemo raditi – izjavio je Ajnadžić, najavljujući i drugačiji, bolji izgled oko Narodnog pozorišta.

Direktor Sarajevo Film Festivala Mirsad Purivatra izrazio je zadovoljstvo dosadašnjom dugogodišnjom uspješnom suradnjom s Općinom Centar.

-Raduje nas da svake godine imamo konkretne pomake u boljoj suradnji i vjerujem da lokalna zajednica ne samo doprinosi, nego i uživa u tome da Festival donosi jednu novu vrijednost i na taj način poboljšavamo i život lokalne zajednice i doprinosimo kulturnim dešavanjima u cijeloj regiji – izjavio je Purivatra.

Ajnadžić je najavio i uličnu paradu s oko 300 umjetnika na dan otvaranja Sarajevo Film Festivala 16. augusta, s mažoretkinjima, bendovima i brojnim drugim sadržajima.

25. Sarajevo Film Festival održava se od 16. do 23. augusta pod pokroviteljstvom UNESCO, saopćeno je iz Press službe Festivala. (F, tl)

